



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Haridwar DM, municipal commissioner mapa nungi anentsü

Nick Kyrgios Wimbledon nung masayatsü



VOL. XXII ISSUE NO. 230 (ADOK 230)

DIMAPUR

RASEMNÜ (WEDNESDAY)

AAMI (JUNE) 04, 2025

₹ 5.00

Nagaland nung FOCUS project takok ngua inyakogo

Dimapur, June 3, 2025 (TYO): Fostering Climate Resilient Upland Farming System in the Northeast (FOCUS), Nagaland project takok ngua inyakogo.

Mongulbarnü De Oriental Grand Hotel, Kohima nung project completion workshop ka agiogo.

"Nagaland nung iba mapatong takok ngua inyakba ya alizüng tongtipang ka atongba lir. Külem alizüng, külemi yaritepba aser sendaktepa alir ajaki meranga inyakba ajanga iba mapatong takok ngua inyaktetogo" ta Agriculture Production Commissioner & Mission Director, FOCUS, Wezope Kenye-i ashi.

Nagaland nung agriculture sector nung tangalen nungi teyari agüja inyakba mapatongji FOCUS ya mezüng lir. Iba mapatong ya International Fund for Agricultural Development (IFAD) den yaritepa inyak ta Kenye-i ashi.

Nagaland nütsüng yongsük 70% tema aluyimba nung dak metaloka lir aser iba mapatong ajanga temelenshi tulu bentsür aruogo ta paisa ashi.

Iba mapatong ajanga senotsü arutsü maongkatem agütsüba dang masü saka climate resilience yangertetogo aser aluyimertemi tajungba züina aotsü tashi agütsüogo ta Kenye-isa shisem.

FOCUS ya January 25, 2018 nungi tenzük aser March 31, 2024 nung tembangtsü sentong liasü. Ajisüaka, COVID-19 wara ajanga timtem jenti bentsür aruba agi atsülangtsüsa aküm ta paisa metetdaksü.

"FOCUS mapatong ya district 9 nung yimtsüng 645 nung inyakogo. Iba ajanga kilen 1,18,000 tashi indangindanga tajangzük nguogo aser iba ya target group nung 89% lir" ta Kenye-i ashi.

"Iba workshop ya mapatong tembangba atema dang masü saka küm 7 tashi asen state nung upland farming systems ajungkettsü atema amalitep, bendanga agütsüba aser meranga tembanga inyakba atema alir" ta State Project Director FOCUS, Ramnikant Kumar, IAS-ia ashi.

Iba sentong nung Country programme analyst, IFAD CO, Piyush Kanal-i FOCUS maparen indang osang lemsatöp.

T.R Zeliang-i ali anenoka aidak semdang

Kohima, June 3, 2025 (TYO): Deputy Chief Minister aser National Highways in-charge, T. R. Zeliang-i Mongulbarnü Kisama Heritage Village anasa Phesama nung gari lenmang anenoka aiba tesem semdangogo.

Iba tesem nung NH-2 nung 50-meter shi anenoka iogo aser iba ajanga Nagaland aser Manipur tsüngda tesentaktep mali kümogo.

TR Zeliang den külemi State Public Works Department aser National Highways and Infrastructure Development Corporation Ltd. (NHIDCL) ketdangsürtemi iba tesem semdang aser mapa inyaksü tetuyuba agütsü.

Zeliang-i NHIDCL dang khu abenba garitem aser senzusenbongertem atema tanga lenmang ka yanglutsü metetdaksü.

"2013 nungi iba lenmang kasa tesem nung asemben tashi ali anenoka iogo. Iba khuret ya teti atema koktettsüla" ta Zeliang-isa ashi.

Pa aser Chief Minister

Neiphiu Rio nati Ministry of Road Transport and Highways dang tanga lenmang ka meshia zülüogo ta paisa ashi.

Southern Angami Public Organisation-i tanga lenmang ka yanglutsü shidangba NHIDCL-i reprangdangtsüla ta Zeliang-isa ashi.

"Tanga lenmang ka khien atema atutsü tebilemba lir saka iba atema ali nüngdaksü. Ali kiburtemi mulungra aser amalitepra anogo 10 tsüngda iba lenmang tutettsü" ta NHIDCL Executive Director R.P. Singh-i Deputy CM dang ashi.

Iba sentong nung ali kiburtem pusema yariteptsü mepishir aser district administration ajanga ali melen temenok anepalutsü ta Deputy CM Zeliang-i metetdaksü.

Phesama Village Council Chairman Beizo M. Kuotsu-ia Deputy CM dang akokba tashi yariteptsü nangzük.

"Tesüiba nunga yimdaklirtemi humanitarian grounds nung ali agütsüogo aser tang-a kasa tangatetba lir" ta Kuotsu-isa ashi.

KMC office nungi Rs 1 crore shi auya

Kohima, June 3, 2025 (TYO): Kohima nung kanga dang tesüngmangtsü tatalokba ka lir aser ibaji Kohima Municipal Council (KMC) and Kohima Smart City Project office nungi Rs 1 crore jungnua auyaa bener aoba lir.

Iba ya yasüng atalok asütsü akok ta temulung melempi bilemer aser Mongulbarnep office-i sweepers aruba sülen ang metet.

Iba dak sendakba nung FIR ka benokogo aser auertem aputsü aser sen kwi sama metettsü atema bushisüngdang ka tenzükogo.

Nagaland sorkari Reservation Policy atema commission ka tentettsü

Küm 5 CORRP-i Jun 17 tashi lungkak aitba anena atar



Kohima, June 3, 2025 (TYO): Nagaland nung kin 5-i reservation policy atema agütsüba onüktem asadangtsü atema state sorkari anogo 15 tsüngda Commission ka tentettsü mulunga agizükogo.

Five Tribes Committee on Review of Reservation Policy (CORRP)-i kin 5 hohotem aser state sorkar tongti ketdangsürtem den senden ka amenba sülen CORRP Convenor Tesinlo Semy-i iba osang metetdaksü.

Iba senden ya Mongulbarnü Deputy Chief Minister (Home), Y. Patton-i Chief Secretary Conference Hall nung ayonga amen.

"Sorkari June 17 tashi nung Commission ka tentettsü nangzükogo. Iba commission ajanga kin pungui agütsüba tongtipang onüktem asadangtsü aser sorkar dangi parnok tebilemba abentsü. Iba sülen cabinet-i lemtet ka agütsü" ta Semy-i ashi.

Anogo 15 tembangba sülen CORRP-i maneni sorkar den ajuruteptsü ta pai ashi.

Commission nung shirnok shimoktsü ta osangbeneri asüngdangdang "ibajibo cabinet-i dang lemtettsü" ta Semy-i langzü.

Nagaland nung major Naga

tribe 5-i mepelaba sayua May 29, 2025 nü district balala nung lungkak aitba sentongtem ayonga agi. Parnoki Nagaland nung küm aika mekongshii aruba job reservation policy meyipa reprangshitsü takhangba agütsür.

Iba sentong ya CORRP lenisüba kübok agi. Nagaland nung kin pungu- Angami, Ao, Lotha, Rengma aser Sumi tongti teloktemi tashi agüja CORRP ya 2023 nung tentet.

Parnoki September 20, 2024 nü memorandum ka agütsüba aser April 26, 2025 nü anogo 30 nü ultimatum agütsübatem nenshia Nagaland sorkari telangzüba magütsüba atema "Ultimatum Reminder" ka agüja liasü.

Nagaland nung tang benshiba reservation system ya 1977 nung küm 10 kümsük atema yangluba liasü. CORRP-i iba policy agientsü mesüra anünga aliba unreserved quota nung kin pungu atema exclusive reservation agütsütsü akhangar.

Mezüngbo kin tenet nem küm 10 atema non-technical aser non-gazetted posts nung 25% quota lemozükja liasü. Item kin ya parnok shisaliok aser rongsenketzüng jenjang

repranger 'backward' ta züngok. Iba sülen reservation ji 37% kümogo aser iba nungi 25% ji Eastern Naga BT tribes aser 12% ji tanga BT tribes 4 atema lir.

"Kin hohotemi tang benshiba Backward Reservation policy agientsü mesüra tanüngba remaining quota kin pungu nem agütsütsü takhangba agütsü" ta Deputy CM Y. Patton-i ashi.

"Talangka jembitepba sülen parnoki committee ka, bi-parliamentary commission ka tentettsü mepishi" ta Patton-i osangbener dang ashi.

Sorkari kin hohotem dang cabinet-i iba onük jembitsü atema June 17 tashi atatsü mepishi. Parnoki iba tebilemba agizükba aser lungkak aittsü aliba thinena ayutsü lemtetba atema pelar" ta paisa ashi.

"Cabinet-i anogo 15 tsüngda senden ka amentsü commission tentettsü imlar. Kin tanishirtem dang cabinet lemtet ashitsü aser nüngdakra sendentem amentsü" Patton-isa metetdaksü.

Sorkari commission ka tentettsü nangzükba sülen CORRP-i anogo 15 tashi lungkak aitba sentong magii atatsü telemtetba agiogo.

Nagaland nung tzünglu ajanga teraksa aika bentsür aruogo

Kohima, June 3, 2025 (TYO): Nagaland nung tzüngluruwa mongpu tonga aruba ajanga anentsüh aluba, lenmang noktangba, kiojen raksaba aser tsünusenbongtsü raksaba osangtem lir.

Iba osang ya Nagaland State Disaster Management Authority (NSDMA) nung Commissioner & Secretary to Government of Nagaland, Lhouchalie Viya-i metetdaksü.

Kohima district nung Kisama Heritage Village anasa ali anenoka ai aser Kigwema-Mima-Chakhabama nunga anentsüh tulu ka alua lir. Maneni Phesama yimtsüng nung retaining wall ka chirep ta Viya-i ashi.

Tuensang district nung Phingjang Ward, Tuensang town nung anentsüh alu aser Tuensang yimtsüng kübok Tobu lenmang shibanga lir.

Longkhim sub-division kübok Phir Ahir yimtsüng nunga mopung agi Anganwadi centre ka raksatsüogo ta pai ashi.

Kiphire district nung Khongiri aser Mimi yimtsüngtem tsüngda, Luther yimtsüng, aser Pungro Town anasa tesem aika nung anentsüh alua lir. Singrep yimtsüng nunga anentsüh alua lir aser Moya o Pungro yimtsüngtem nung alu aika raksago.

Meluri district nunga anentsüh alua Village Guard Office guard room raksatsüogo. Araju River nung tzu mesemi ayimba ajanga Reguri yimtsüng nung tsüklü aika raksatsüogo aser Wutsi Colony nung retaining wall chirepdang ki ka raksa ta Commissioner & Secretary Viya-i metetdaksü.

Noklak district kübok Noklak-Chingmei-Tuensang, Noklak-Pangsha, Panso-Tuensang, and Panso-Saddle-Tuensang lenmang tem anentsüh aluba ajanga lenmangtem shibanga lir.

Shamator district nung mopung tesashi aonba aser tzünglu kanga aruba ajanga Chassir yimtsüng nung mentilu aika raksatsüogo. Maneni

Shamator aser Kiphire tsüngda anentsüh tulu ka alua lir ta Viya-isa ashi.

Mokokchung district nunga Mongsenbai Ward, Mokokchung nung retaining wall ka chirepdang ki ka raksa. Maneni, Luyong Ward, Mangkolemba sub-division nunga kasa lendong atalokdang footpath ka aser ki asem raksago.

Tribal Circuit Doyang nung anentsüh aludang electric poles aika lao aser iba ajanga Wokha district nung power timtem ajurua lir ta Commissioner & Secretary-isa ashi.

Zunheboto district kübok Atoizu sub-division nung anentsüh aluba aser Peren district nung Vamsi Akilesh aser New Ngaulong tsüngda lenmang anenbangba osangtem lir ta paisa ashi.

Item tatalokba nung nisung yiruba mesüra taküm samaba osang kecha mali saka District Disaster Management Authorities (DDMAs) ajaki tzüngluruwa mapang züngyanga alitsü metetdaksür ta NSDMA-inenshiogo.

Noklak nung L Hangthing tushia sentong ka ayongzük



Padma Shri Award 2025 angusang L Hangthing aser dangartem külemi tangokba noksa ka yangi angur.

Dimapur, Aami/June 03 (TYO): Agriculture nung Padma Shri Award 2025 angusang L Hangthing nem tetushi agütsüba sentong ka June 2, 2025 nü White Hall, Noklak village nung agia liasü. L Hangthing dang Nagaland indang 'Fruit Man' ta ajar.

Iba sentong nung Padma Shri sempet angur L Hangthing-i sentong ayongzük aser yimtsür-yimer dang pelaba lemsatepa liasü.

Pai metsüjang tamajung atemba aser liyonga arudang tetsükdaksü balala ajangshiba indang bilemteta jembia liasü.

Pai iba award ya Nagaland nung aliba aser Khamniungan kin nungi aluyimer nem bendanga agütsü aser "Tila-teri nung tepela sayuba ya tajungtiba inyaksü meranga aliba nisung kar atema tongtoret ama akumtsü," ta pai ashi.

Akhi alemi otsüla-oboula nung mapang nungi alu yima aru aser sorkar indang department balala teyari nung temaba jenjangi ajungketer, ta

pai ashi.

Khamniungan Tribal Council (KTC) tir Ngon-i sentong nung jembidang, Khamniungan kin nungi iba ama konang tulu anguba tang mezügbuba lir, aser iba yagi tarutsü nung takok tali angutsü asoshi lenmang lapoktsütsü imlar, ta ashi

Khamniungan Students' Union (KSU) tir Shangchiu-i jembidang, Tsüngremi asen nüburtem kanga moatsüogo aser tenügsang agütsüba yimya sübatsü tongtipang ta ashi aser iba sempet yagi ajak ajungmesor, ta ashi.

Sentong nu Khamniungan Menyu Hoikam (KMH) tir Chongkoi-i Thang Village nungi yimtsü-yimbo aser arogo lenirtem dang pelaba lemsatap aser parnoki shisatsü aser sarasadem agi yariba ajanga iba takok ya ngutet ta ashi.

District administration tenüng nung SDO (Civil), Noklak, Vikhoto Richa-i jembidang L Hangthing-i meranga inyakba asoshi pelaba lemsatepa liasü.

Baptist Church Thang village indang deacon board ajanga takok angur madak Tsüngrem temoatsü meshizükja sarasadem balaka agia liasü.

Iba sentong nung Longkoi Khamniungan, Associate Pastor, BCT menden liasü, Rev. Chellia-i sentong tenzüka sarasadem, Noklak Village Council chairman Papan-i pela agizükba o jembia liasü.

Maneni TPO indang Executive Chairman ajanga melepzüng o jembia aser Kusong Baptist Church nungi pastor Kai-i sentong tembanga sarasadema liasü.

Iba sentong ya Noklak Village Council, Thang Public Organization aser Thang Students' Union lungjemer ayongzükba liasü, kong Department of History and Archaeology, Nagaland University nungi Doctor of Philosophy angur Heme Lamthaiu aser NBSE kübok HSLC examination 2025 nung top 7 aser 15 jenjang nguteter Niamkoi P aser Phaam B nung nema tetushi agüja liasü.

Impur nung süarba aser chiyungtsü balala yangluba training agi



Dimapur, Aami/June 03 (TYO): ABAM Women Ministry, Vocational Training Cum Production Centre (VTPC) ajanga ABAM Zone I Dorka Cell group asoshi sü arba aser chiyungtsü tabu balala yanglutsü trainingka June 2 & 3, 2025 anogotem Impur nung agia liasü.

Iba sentong ya pei sasa inyaktetba ajanga kija aser kibong nung mapa aika nung teyari agitetsü nukla nung tenzüka, aser Tsüngrem tauchi ajanga tanü kiyim lanutsür aika pei inyaktetba mapa ajanga teyari balala agia odar.

Iba training nung shisa len sayurtem Aienla aser

Imtirenla L. Lemtur liasü.

Ajak agi arogo 11 nungi kiyim lanutsür 22 arua iba training nung aden. Tsüngremi parnoki inyakba mapa ajak nung temoatsü agüjangma, ta Rev. Tamsü Jamir, Executive Secretary, ABAM ajanga sangdong ka nung ashi.

DC, Phek ajanga nüburtem dang kumdanga alitsü tuyu

Dimapur, Aami/June 03 (TYO): Deputy Commissioner & Chairman District Disaster Management Authority, Phek, Rhosietho Nguori-i sangdong ka nung nüburtem dang meyi tenzüka ajanga mapang shia tzünglu kanga sashia arua Phek district nung lenden aser tenemtsüng len tzü atsingdena, ajungben tzümet süng adokba, alinen aluba aser ayong nung tzü tali ayimtsü akok ta ashi.

Anungji nüburtem ayongkum anasa picnic mesüra angu pua mesenzütsü ajungshir, ta ashi.

Maneni Area Administrative Officers/Heads of the Departments/ Village Disaster Management Authority/ Village Council Chairmen/ Head GBs/ Ward Authorities tem dang saksalema alitsü metetdakja liasü.

NSCN/GPRN ajangazüngsemana mapanungi anentsü

Dimapur, Aami/June 03 (TYO): Meluri Town nungi Tatar Nurule Nyuwi jabaso Tsiaratho Nyuwi dang ketdangsüri aiben tekumdangtsü shiaka pai maneni ozüng alema inyaksangshiba mechi linük tenzüka mapa nungi anentsür, ta NSCN/GPRN sangdong ka ajanga ashi.

MIP ajanga Ato Kilonser indang office nungi iba totuyuba agütsüba nungya pa tang nungi mapa nung anentsür ta shia lir.

Ano totuyuba ka nung Ato

Kilonser indang office ajanga Deputy Kilonser Bitong Sangtam, s/o Lt. Imtilemba Sangtam, Tuensang Town ya Active National Service nungi 'personal reason' mechi mapa nungi anisüngzük agütsür ta ashi.

Bitong-i linük asoshi bendanga agütsür inyakba ya Naga nung puti otsü nung teti alitsü. Pa dang iba totuyuba ngur tekeratiba nung 'discharge order' ya National Tatar Hoho indang office nem agütysütsü metetdaksür, ta sangdong ajangasa ashi.

Wokha nung Weekly Bazaar ka tenzüko



Dimapur, Aami/June 03 (TYO): Nagaland State Rural Livelihood Mission (NSRLM), District Mission Management Unit (DMMU) Wokha ajanga Self Help Group (SHG) federations pongu den lungjemer Public Ground, Wokha nung June 3, 2025 nü Weekly Bazaar tenzüka sentong ka ayongzükba liasü.

Iba sentong nung akhumdong ka ama Advisor, Agriculture, Mhathung Yanthan liasü aser pai sentong nung jembidang iba sentong ajanga aluyimer aser entrepreneurs yaritsüba indang lemsatepa liasü.

Market chain accessibility, local product promotion aser nisung ajungai khuret bena yimdak yimtsüng nung rongsenketzüng tashi itdaksütsü tongtipang, ta pai ashi.

Self Help Groups temi producers aser markets tsüngta tesendaktep melenshütsüba indang pai rateta ashi aser aluyimer atema credit lines agütsüba indanga jembia liasü.

Sentong nung NSRLM indang State Mission Management Unit nungi

ketdangsür kati Weekly Bazaar nükjidong dak rangloker o tatsüka jembia liasü.

Market accessibility, osettsüset nung jenjang aziükba, local trade tajungba kumdaksüba aser local economy ainba nung yariba densema ketdangsüri iba sentong indang nükjidong lemsatepa liasü.

Parnoki mozü mamshi alu ayimba yimya amshitsü, sustainable agricultural practices amala indanga jembia liasü.

Sentong nung Convenor, District Marketing Committee, Zuchibeni Odyuo menden liasü aser District Functional Specialist, NSRLM, DMMU Wokha, Daniel Ovung ajanga melepzüng o jembia liasü.

Iba Weekly Bazaar ayongzükba SHG federation pongu ya Samyan Federation, Sanis Block; Lijü Federation, Wozhuro; Zukhumki Federation; Echungron Cluster Level Federation; aser Englan Yingsung WLT and CCS Ltd alitsü.

Iba Weekly Bazaar ya anepdang 6:00 ako nungi tenzüka hopta ka ung anaben ayongzüksü.



Bhopal nung Ravindra Bhawan nung Opposition lenir aser Congress MP Rahul Gandhi-i party convention nung jembiba noksa nung angur. Senden nung district aser block tirtem aser AICC züngsemtemi shilem agia liasü.

Opposition party 16-i special Parliament session ka agitsü akhanger

New Delhi, Aami/June 3 (Agencies): Opposition party 16 nungi lenirtemi Pakistan anema Operation Sindoor benokba dak sendakba nung Parliament special session ka agitsü khanga Ato Kilonser Narendra Modi dangi shiti ka yokogo. Iba dak sendakba nung INDIA bloc party tem senden ka Mongolbarnü linük yimtiba nung mena liasü.

Congress, Trinamool Congress, Rashtriya Janata Dal, Samajwadi Party, aser Shiv Sena (UBT) nungi lenirtem densema party balala nungi lenirtemi senden nung shilem agi. PM dangi yokba shiti nung INDIA bloc MP temi sign süa lir aser Ato Kilonser dang Parliament special session ka agitsü takhangba agütsüogo, ta opposition lenirtemi ashi.

Congress lenir tejen Jairam Ramesh aser Deependra Hooda, TMC lenir Derek O'Brien, SP nungi Ramgopal Yadav, RJD nungi Manoj Jha,

aser Shiv Sena (UBT) nungi Sanjay Raut nungeri senden nung shilem agia liasü.

Shiti nung sign asürtem rongnung DMK-a densema lir, saka Karunanidhi asoba anogo den denchitepba ajanga parnok senden nung medentet.

National Conference, CPI(M), IUML, CPI, Revolutionary Socialist Party (RSP), Viduthalai Chiruthaigal Katchi (VCK), Kerala Congress, MDMK, CPI(ML) Liberation nungera sign asürtem rongnung densema lir, ta opposition lenirtemi ashi.

Senden nung Aam Aadmi Party (AAP) maden saka parnoki kasa takhangba agüja PM dangi shiti ka zülutsü.

Ajisüaka special session akhangba party tem rongnung Nationalist Congress Party (SP) bo densema mali.

"Parliament special session ka agitsü khanga party 16-i Ato Kilonser dangi shiti ka zülüogo. Shiti nung Poonch, Uri, Rajouri

indang shia lir aser Parliament nung sadem sadema sensak asemtsü atema shisema lir. Sorkari Parliament nem telangzüba agütsütsüla aser Parliament-i nüburtem nem telangzüba agütsütsüla. Ibayongji onoki Parliament special session ka agitsü akhanger. AAP-i asüng PM dangi shiti ka zülutsü," ta Derek O' Brien-i osangbenertem dang ashi.

Kiralongrartemi Pahalgam amakba sülen Opposition party aikati Parliament special session ka akatsü khanga arudar. Iba takhangba ya party ajak senden nunga benokogo, koba Operation Sindoor indang MP tem nem metetdaksütsü atema agia liasü.

Kiralongrar inyakyim dak sendakba nung India tenokdakba metetdaksütsü atema India nungi party balala lenirtem linük balala semdanga aoba meyipa aruba sülen iba session ya June nung agitsü TMC-i shidangogo.

Pakistan atema itangiter mapa inyakba asoshi Rajasthan sorkar tenzüker ka apu

New Delhi, Aami/June 3 (Agencies): Rajasthan sorkar tenzüker ka shiba taoba mapang Pakistan atema itangiter mapa inyaker asütsü ta temulung melemi sota liasü pa puogo, ta police-i Mongolbarnü metetdaksü.

Jaisalmer employment office nung Assistant Administrative Officer (AAO) Shakur Khan-i Pakistan nem tongtambang osang agüja liasü, ta parnoki ashi.

Pa dak temulung melemi mapang tatsüka asadanga aruogo. Meita ataba mapang agency temi pa Pakistan High Commission den sendaka aliba nisung ka tenüng agi Ahsan-ur-

Rahim den mapangshia tongtepratepa aliba nguteta liasü, ta Inspector General (CID-Security) Vishnu Kant Gupta-i ashi.

"Khan ya anogo ishika tejakdang ken o ashishitsü atema sota ayu aser Raipur nung central interrogation facility nung intelligence agency balalai ken o ashishiogo," ta Gupta-i ashi. Paisa, Khan-i taoba mapang Pakistan-i aotsü atema Pakistan indang visa meshia liasü.

Pai Pakistan semdanga mapang Pakistan indang spy agency ISI indang agent den ajurutepba bushisüngdang

ajanga ngutetogo. Pa India-i meyipa aruba sülen tongtambang osangtem bendena WhatsApp amala sabangtem ajanga Pakistan nung handler tem nem osang agütsüba ngutetogo.

Gupta-i ashiba agi, iba ken o ya Official Secrets Act, 1923 nung aibelen ka lir. "Khan anema ken o ka benokogo aser Act kübok section tapet dak ajemdaker pa puogo," ta pai ashi.

Khan ya yimden yimsüsüba dak sendaka ali mali iba indang police-i osang tejangja magütsü, saka source-i ashiba agi pa taoba mapang taoba Congress minister Shale Mohammad indang personal assistant (PA) liasü.



North Sikkim kübo Chaten tesem nung anentsüh ajanga sabanga alirtem kümzüka East Sikkim-i anir Aruba noksa nung angur.

India nung Covid-19 tashidak menar 4,000 adenogo; nisung 5 asü

New Delhi, Aami/June 3 (Agencies): India nung Mongolbarnü tashi nung Covid-19 tashidak menar 4,026 jungogo aser taoba ghonda 24 tsüingda nisung pongu süogo, ta June 3 nü sayaba health ministry data nung shia lir.

Gujarat nung nisung timba dak tashidak mena-a anogo ka nung nisung 59 dak coronavirus putetogo aser state nung ajak senteper tashidak menar alir 397 jungogo. Kerala aser Maharashtra na tashidak agi tamajungtiba kongshir lir aser kasa mapang nung Delhi, Mumbai, aser Bengaluru nunga tashidak menar timba küma odar.

Tang tashi nung tashidak aneper 2,700 jungogo aser asür 37 jungogo. Asürtem rongnung Kerala nungi arishi küm 80 tain tebur ka densema liasü shiba pneumonia, acute respiratory distress syndrome (ARDS), diabetes, hypertension, aser coronary artery tashidak keta liasü aser ano Maharashtra nung diabetes aser hypertension tashidak keta aliba arishi küm 73 tain tetsür ka dena süogo.

Health ketdangsürtemi ashiba agi, tashidak menar tali küma aoba ya Omicron sub-

variants tasenba den sendaka alitsü ta amanger, aser nüburtem dang kümküma alitsü metetdaksüogo. Mozükidangi oa temang anepalur kanga ajema liaka ketdangsürtemi genome sequencing jenjang ajungketshiogo aser nüburtem dang kümküma alitsü metetdaksüogo.

ICMR Director General Dr Rajiv Behl-i nüburtem dang maoksatsü ayongzüka den, "onoki ken o kanga junga asadangdar. Tang kecha shisabulutsü mali, saka ken o asadanga alitsü aser kümdanga alitsü kanga tongtibang," ta ashi.

Union Minister of State for Health and AYUSH, Prataprao Jadhav-ia, Covid dak sendakba nung jongka tenüngdakbatem atema telangzüba agütsütsü asoshi sorkar renema lir, ta ashi. Paisa, taoba mapang yangluba oxygen generation plants aser ICU yipdentem asadangshia renemshidar, ta ashi.

Coronavirus ya India nung May tom nungi poktetshiogo aser Kerala aser Maharashtra nung nüburtem terara timtemba putet aser Genome sequencing sülen Omicron subvariant JN.1 tasenba ta jangja liasü.

Haridwar DM, municipal commissioner mapa nungi anentsü

Dehradun, Aami/June 3 (Agencies): Uttarakhand nung Pushkar Singh Dhami-i aniba sorkari Mongolbarnü IAS officer ana den ketdangsür ti, Haridwar nung sen crore 54 alang ali ochi mashi ken o nung aija mapa nungi anentsüogo.

Chief Minister Pushkar Singh Dhami-i Vigilance Department dang iba ken o tatongi bushisüngdangtsü atema tetuyuba agütsüba den ali atema tenangzüktepba yanglur alibattem thitsütsü tetuyuba agüja liasü.

Chief minister-isa, Chaudhary municipal commissioner asüba mapang Municipal Corporation Haridwar nung inyakba mapa ajak atema special audit ka agitsü tetuyuba agütsüogo, ajita asünungdang senotsü ochi meshi-i amshiba kanga junga bushisüngdangtetsü.

"Ochi mashi inyakyim khenyongi magizüksü," ta CM-i ashi. Chief Minister Dhami-i tetuyuba agütsüba sülen Department of Personnel-i suspension order ya agüja liasü.

"Bushisüngdang nung aibelen aoba ngutetba ketdangsür ter mapa nungi anentsüogo aser personnel ana indang service extension thitsüogo," ta official sangdong

ka ajanga metetdaksü.

Senior finance officer Nikita Bisht, senior personal assistant Vikki, registrar kanungo Rajesh Kumar aser chief administrative officer Kamaldas nungera mapa nungi anentsüogo.

IAS Ranveer Chauhan-i taoba hopta benokba ken o ka bushisüngdangba sülen iba jenjang agia liasü.

Iba report nung Gram Sarai nung jana bendenba tesem ka anasa Haridwar Municipal Corporation-i sen crore 54 agi ali hectar 2.3070 shi aliba mapang inyakyim nung aibelenba atema ketdangsürtem anema jenjang agitsü benoka liasü.

Iba ali ya alu nungi commercial ali kümdaksüba ajanga ali jenjang ya sen crore 15 aliba nungi crore 54 küma liasü.

Tang tashi nung iba ken o nung aija jenjang agir aliba ketdangsürtem rongnung Sub-District Magistrate, Haridwar Nikita Bisht - Senior Finance Officer, Haridwar Municipal Corporation Vicky - Senior Personal Assistant Rajesh Kumar - Registrar Kanungo, Tehsil Haridwar Kamaldas - Chief Administrative Officer, Tehsil Haridwar nungera densema lir.



TIR YIMYIM YIMOBILEM (EDITORIAL)

DIMAPUR WEDNESDAY, MAY (AAMI) 04, 2025

Tangarbo lendong nung lir !

Taoba anogo ishika Northeast state tenetprongla amshia tzünglu kanga aruba agi nisung 40 dak tali asüba osang lir aser ano nisung lakh dak tali talidak maka timtem tulu nung lir. Item kitemji kar tzümetsüng agi atsüngbang aser kar anentsü agi anembang ta nisung tashi agibo kümzüktettsüla masü alima lendong tulu nung raksabatem lir. Aji oda, item lendong tulu ajanga kar mangyimer aser kar takoksa tulu ajurur tejenokdak maka, tebang agi ashitsü makokba timtem tia ajurur lir. Atangji, Nagaland nunga tanga Northeast state-tem nung aruba ama taoba anogo ishika tsünglu kanga sashia aruogo aser ibaji ajanga tesem-tesem nung anentzü alua lenmang raksaba takoksa aser timtem ajuruba osangtem angashir. Ajisüaka, Nagaland nungbo tang tashi tzünglu kanga aruba agi tzümetsüng adokba aser anentsü alua nembangba ajanga asü-ama aser nisungtem talidak makatsüsa kiojen raksaba osangbo mali, aji tamamangtsüka lir, kechiyong tanga state-temji yutsür külen Assam aser külen Manipur nung tzümetsüng aser anentsü agi nisung asüba aser timtem takoksa ajuruba osang aika lir. Iba tiaji kodang bilemdangdir, Nagaland yabo Tsüngremi alima lendong timtem nungi kümzüka ayuba temoatsü lima ka lir aser idakji asenok kibur küma alitsü toktsü. Ibaji kodang asenoki angatetdir, asenoki ma ta Tsüngrem tenüng asangtsü aser Tsüngremi mulungba nung asenok ali tenzüksü. Atangji, alima lendongji kong kodang kechika ataloktsüar memetet, anungji Nagaland nunga tzümetsüng, anentsü, yipru mopong aser menoknok lendong kodanga mataloktsü ta mali, anungji item lendongtem nungi asenok kümzüka alitsüsa asenok teinyaktsübo shitak inyaka atatsüla. Aji oda, Nagaland ama tenem lima Sikkim nunga dena sepaitem alidak anentsü aluba agi sepaitem asem tasü mang ngutetogo aser sepaitem trok kong samar memetet samar bushitepba osang angashir. Itemji dang masü saka Sikkim yabo raliwalirtem jajaba lima ka asünungji, parnok raliwalirtem terka mener jajaba gari ka ayongi ajuoka aiba lendong nung nisung tasü mang ka ngutetba dak alaka tangar tanüngba pur tibo kong aliar meshitet bushitepba mapang lir. Ano, asen lima ama tenem lima nungsa Arunachal Pradesh nunga tzümetsüng aser anentsü aluba lendong nung nisung 10 asüba osang lir. Iba state nungbo yim 156 tzümetsüng agi atsüngbanger yimtakirtem timtem takoksa tia tulu nung lir. Temulung ashitsü kaji, gari ka nung kibong ana külemi mener aoba mapang tzümetsüng agi gariji ponger aoba lendong nung gari nung mena alir nisung tenetprongla taküm samaba osang lir. Ano, nisung karbo alu nung mapa inyaka alidang anentsü agi nembangba osanga lir. Aji oda, ajak dang tamajungba tzümetsüng aser anentsü lendongji Assam nung atalokdagi. Assam nung nisung ter dak tali asüba osang lir aser shiruru, alu aser kiojen raksaba agi nisungtem lakh dak tali talidak maka, nisung kar government-i lapoktsüba relief camp nung aser karbo lenmang lendi nung tzümetsüng agi matongdak sü ki tilala songpanger yangji timtemseta aliba angur. Aji oda, asenoki oa mereprangra mamangtsüa akok saka tang tashi tzünglu maneni anogo aika aruba ajanga Assam nung yim 764 atsüngbanga lir aser alu hectares 3524 tzü telongi luogo aser iba denji kiset shiruru jenti süogo. Aji oda, tsüraburemi jembiba ama, jeper nüktzü malu timtemba mapangji, Nagaland state dak alaka, Northeast state ajak nung tang ya ajurudagi. Aji oda, kasa Nagaland ama tenem lima Mizoram nunga tzünglu kanga aruba agi ki chirepba aser anentsü aluba lendong nung nisung dena asüba osang lir. Kasaji, Manipur aser Tripura nunga anentsü aluba aser tzümetsüng adokba agi nisung aika pei ki raksar talidak maka government relief camp nung lir aser kaketshirtema kaketshidaki moutettsüsa timtem takoksa ajurudagi. Item tia den asen tia medemdanga, Nagaland nung alir Naga nungertemi Tsüngrem taochi reprangteta Tsüngremi mulungba inyakra aser pei lima aser pei alidak yimti aser yimtsüng ajak topur junga yutetra, ibaji Tsüngrem tsüngdang tsüa aliba sentsü küpdoker amai asütsü. Asen meketa tangarbo yamaji lendong timtem tulu nung lir saka asenokbo tesünep aser tepela nung yutsüba ya shibai yutsüa ta bilemstü aser iba taochi aser temeim melena asenokia shiba nem kechi agütsütsü ?

OLEMSABANG

Anema alitsü atema tongmelang tetuyuba kar

~ Dr.N.Meren Imchen, Lower Bayavu Hill,Kohima.

Alemlü mapang nungi meimchirtemi tashitak azüoka ayutsü jangra-a aser meranga aruba otsü nung angur. Mozü shitetertem, putirtem, sungo-lio mozü yanglurtem aser arasenerkem ajaki meimchir tashitak anebtsütsü aser shirangertem jungdaktsütsü atema lenmang balala bushia aru. Tanü asüng ama temetetba(scientific medical knowledge) kecha maliba mapang suaka meimchir timtem sunepdaktsütsü atema par mapang lenmang tajung aika bushiteta amshia arubaji amajokbo masü ta ajiteter.

“Anema alibaji rongsen” ta asüba shin o ya shingaia nunga ta meshitetsüsa meimchir ajaki pei taküm nung mesuaka pei kibong mesura kinunger dak ajangshia aruba asenok ajaki metet. Temang anema alitsü atemabo asenok shingaia rongsen endoktsü mapayur iba jagi temangji rongsen dang nungi taoba ta shiteter. Anungji anema alitsü tasatemji tali rajema metetsü atema anema aliba teratetji jangja-a angatettsü nungdaker.

World Health Organization(WHO)-i 1948 küm sangdongba teratet(definition) kizüngji danga angatet nung pei sasa anema aliasü mali jangja-jangja-a metettsü aser anema alitsü asoshi tetuyuba lenmangtem ngutettsü ta amanger. Ibenjagi danga tashitak tapu balala indang tesayuba ka masü saka anema aliba indang teratet(definition of Health) nungji dang tongtipang agüja amendaker tongmeleng agi zülur.

Anema aliba teratet(WHO): Anema aliba ta asübaji temang nung tashitak mesura shirang-shijii malibaji dang masü saka shi temang,tekolok aser loktiliba taküm, item rangben anema aliba dang ajar. (Health is a state of complete physical,mental and social well-being and not merely absence of disease or infirmity.

I.Shi temang anema aliba temaitsütem(Signs of physical Health):

Na shi temang(Physical) anema aliasü mali item yagi ne sasa metettsü:

* 1)Nisung shia sentsü(complexion) terara balala alitsü akok, kechi sentsü sudir suaka sentsü tajung asütsüla, 2)teküp temeruk,3) nukjang temeruk,4) kü(hair) tashi tait,5) tebangshinem maliba, 6)kanga teyira mesura kanga tekongra masü, 7)ayipjanga mejangba, 8)Temang tsü aser temang jana mapang shitak nung endokba, 9)chiyungtsü bangnanga chiyungba,10) temang tenuk-telen teloktep ajak anuk-anuka arakzütetba, 11)tenuk tajung,tenarongi junga angashiba,teni aser temeli item ajak mapa shitak inyaktetba,12) poknung organs-azü jajaba, tango sashiba, chiyungtsü lenmang,nervous system, temang temperature aser BP ajak shitak alitsüla.

* Item agüja aliba temaitsütem rongnung ka danga meshitaki lira na shi temang anema mali; teyaritsü tim lenmang bushitsüla.

II.Tekolok anema aliba temaitsütem(Mental Health):Na tekolok(Mental) anema aliasü mali ne sasa item ajanga metettsü;


* 1)Nisung ka pei sasa dak temulung sua aser temolung lemteta alir, 2)pei sasa nemja mesura aso-a mebilemer, 3)Mapanga jak nung sungjem-sungjema(calm and composed) aser pela-a alir, 4)pei sasa temulung nung rara-a malir(no inner conflict), 5)nungsen-nungmen tizüker aser mela-mela meyrur, 6)lokti nung tebilemdang akaba aser awashi temetet, 7)pei sasa azüokteter, 8)mulungthok(emotion) nem mokokdaktsür, 9)tsübuja malir, 10)ain-aping, mokokaji aser shisabulu nem mokokdaktsür, aser 11)timtem aser mepet-mesu ajurudang teshisadang ka-a item khuretem ajangteter.

* Item rongnung kar danga shitak mali ta bushitetra, tanga tekolok tashitak tulu meliaka na tekolok anema mali; tim teyari lenmang(counsellor) bushitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Europe nung tetsübo aser akmesen maliba evangelists nüngdaker: Franklin Graham



Berlin, Aami/June 03 (Agencies): Europe nung osangtajung prokshitsü asoshi tetsübo aser taaktsü maliba evangelist nüngdaker, ta Khristan lenirtemi taoba hopta angaoka liasü.

Iba osang ya American evangelist Franklin Graham-i Berlin nung Europe tesem ajunga nungi Khristan lenir 1,000 dak tema adenshia alidak sangokja liasü.

Europe nung tenyaba mapa tanaben inyaktsü nükjidong nung region nungi Khristan tem tanaben bendanga agütsüshitsü nükjidong nung iba senden ya Billy Graham Evangelistic Association (BGEA) ajanga ayongzük, kong Graham ya tir lir.

Iba mungdang tembangba sentong nung jembidang tebu asür Rev Billy Graham-i

nüburtem dang kechi südir süaka osangtajung prokshiang ta ashiba Graham-i lepshia ashi.

"Tenyaba mapa inyakang - osangtajung prokshiang. Akmesena teli," ta Graham-i telok dang ashi.

"Atsüanema teli. Tashi itshiang. Nü ministry nung takok ngua inyakang. Timtem alitsü ta asenoki meteta lir. Tayongzükba balala alitsü ta asenoki meteta lir. Rara kar alitsü ta asenoki meteta lir. Asenok tashi itshiti aser tanaben arutsü ta asenoki meteta alisang asen Kumtetdakba indang osang prokshiti."

Iba mungdang ya Hokulbarnü tembang, kong Graham-i tarutsü nunga Europe-i meyipa arutsü shia liasü.

"Ni tatem salem mashitsü, saka ni 'Nenok ano ajurutsü,' ta

ashitsü," ta pai ashi.

Iba mungdang nung pai Khristanpur dang Europe nung secularism kanga sashia liaka tasü ita osangtajung proktsü ayongzüka liasü.

"Asenoki Europe atongtsü asünungbo, asenoki army nüngdaktsü, tetsübo maliba, akmesen maliba evangelist army - Tsüngrem o nung nokdaktsü nüngdaker," ta pai ashi.

Berlin nung Graham-i Ukraine Tir Volodymyr Zelenskyy ajuru aser pa den külemi yimjung asoshi sarasadema liasü.

"Ni Tir Putin asoshi sarasademtsü, ni pa (Zelenskyy) atema sarasademtsü, aser ni Tir Trump asoshi sarasademtsü - Tsüngremi parnok nem shisatsü agütsütsü aser yimjung asoshi Tsüngremi lenmang sayutsü asoshi sarasademtsü."

"Ukraine aser Russia nung tebenja ya kanga tamajung, aser Tsüngrem kisüngi bentettsü ta ni amanger," ta Graham-i shia liasü.

Iba congress nung German evangelical leader Rev Ulrich Parzany, British theologian Dr Amy Orr-Ewing nungeria jembia liasü.

North Korea nung reshikangshi liaka Khristan yimsü züiner

Aami/June 03, 2025 (Agencies): Khristanpur reshikangshiba asoshi alima nung linük balala asadanga nung North Korea ya mezüngbuba jenjang nung alir aser inyakyim ajunga kanga miimshiba ajanga iba linük nung kechi sa ataloker'ar memetet. Iba linük nung atalokba osang shidak aser tiazü bendangtsü kanga temela masü.

Iba linük nungi Khristanpur kar linük balalai jena aruteta parnok i ajangshibatem lemsateper.

Yamaji jena arur rongnung Illyong Ju ya ka lir, shibai International Christian Concern dang North Korea nung tepuokdak ayutsü, merenshitsü aser tasüba temerenshi agütsütsü ozüngtem liaka Khristanpuri maneni Yisu sülen anidakba aser dangar dang sayutsüngiba indang lemsatepa liasü.

Illyong aser par tsürabortem Chongjin nung ki tilaka nung liasü, kong parnok i miima Christian radio broadcasts angaa liasü. Tatem nung pa aser par kibong South Korea tongtet. Ajisüaka par kinunger ajakbo tia taka masü. Pa tetsütanutsü tepuba tebu ya Khristan ta metetba sülen tetsütanutsü'er kibong ya political prison camp nung lidaktsütsü temerenshi agütsü.

Item camps indang tejangja kangabo meteta mali, saka iba

linük nungi jena aortem apuba timba kanga mejungi amshir. Tashiyim agi mapa tasak inyakdaktsüba, reshikangshia amshiba, tashiyim amshia shi nung medemba, yasa-tzüra yutsüba aser südaktsüba amala item camp nung teti ajurur ta amanger. Yangji tsürabor aser tanur tebila makai kasa temerenshi agütsür.

Illyong-i ashiba agi camp nung aliba par kinunger ya tatem nung tasüba temerenshi agütsü. Kasa North Korea nungi jena adoker Kim-i ashiba agi, la camp ka nung alidang tashiyim amshia la dak shi nung medem aser reshikangshia amshi, kong lai Tsüngrem o lemsatepa liasü.

La camp nung aliba mapang la tamang agi la nem tashi agütsü, ta Kim-i ashi. "YIsu, tang kü temang tekangshi agi sünga lir, saka na koma kangshia liasü? Ni atema na kangki nung meta," ta lai International Christian Concern dang ashi.

Tensa tajungba akumtsü teimla meliaka, par linük nung Khristanpur maneni züiner aser miima tekülem sentong agir, ta Illyong-i ashi.

"Reshikangshi tia ajurur aliba nüburtem dang ni ya shiner, imlibilema teimla tesama. Na asoshi onoki rarar, aser asen Tsüngremi na asoshi rarar - aser asenoki akoktsü. Tsüngremi takok nguogo. Anungji imlibilema teimla tesama,

aser tasü ita liang," ta ashi.

"North Korea nung tasü tait asen adianu tem, külem tamangertem-i osang tajung sayutsüngir. Tangya parnok i Yisu sülen anidakba timba kumdaktsür. Parnoki tenem, lenden aser ali telung nung külemer," ta paisa ashi.

aser tasü ita liang," ta ashi.

"North Korea nung tasü tait asen adianu tem, külem tamangertem-i osang tajung sayutsüngir. Tangya parnok i Yisu sülen anidakba timba kumdaktsür. Parnoki tenem, lenden aser ali telung nung külemer," ta paisa ashi.

Egypt nung küm 1,500 tain Khristan monastery ka shibangtsü akok

Cairo, Aami/June 03 (Agencies): Egypt nung aliba court kati obendang agütsüba sülen alema nung tejentiba aser tang tashi meshibangi amshiba monastery ka shibanga museum kümdaktsütsü akok.

St Catherine's monastery ya century trok buba tiyonglen yanglu aser ibai Tejen Lai aser Tasen Lai den tesendaktep balaka lir.

Yisu nem bendanga agütsüba monastery tejentiba kisüng masü saka ibai Sinai tenemtsüng nung lir aser iba tenem nung Mosa-i Tsüngrem dak nungi Ozüng Ter agizükba Anitet nung shia lir.

Laishiba nung monks aser monasteries indang shia mali, saka Roman Empire-i Khristan yimsü ya state religion ama agizüker mapang tatsüka tsüngta iba amala tesem ya yanglua nüngtugu akum südi ta amanger.

Tamanger tasen sashia akumba ajanga tejen Khristanpur aika tejen yimya

ANOGO ABEN TSÜNGREM DEN

Mapa aser tenzükba ; Tsüngremer telatet

Aser tenetnübuba nung Tsüngremi pei mapa ajak nungi anisüngzük lbri 4:4.

Tsüngremi asenok anogotem mazüngi dangbo melidaktsüner. Pai asenok mapa toktsür Pa nungi anisüngzük agitsü ajungshir. Pai alima ozüng yutsü saka Pai ajak teputtep nung shidak yutsü. Ibaji Tsüngremer teyangluba maparenji lir.

Kasaji asenok taküm asoshi yimya ka tenteta yutsü; asenok tashi telatet ka yutsü. Nisung takümji maneni animesüngzüki dang alitsüba masü. Ibai mapa inyakba aser anisüngzük melentepba alitsüba lir. Kodang asen Kibuba nisung chir ka ama aru, Pa mapa telemtet ka liasü. Pa aputsü aser kangki nung angenloktsü mapang tonga arudang Yisui pa Tebu dang sarasadem, "Nai kü nem kechi mapa teinyaktsü agütsü aji inyakmar külen, ni na alima nung sentsüwangshidaktsü" (Yn. 14:4). Yisui Pa taküm nükjitongji kechi metetta liasü aser iba mapa renemtsübajia metetta liasü. Yamaji Pai asenok nungi aginüba mapaji Pai kechi inyaktsü agütsü aji inyaktsüba. Parnoki sarasademtsü angazüktsüla, "Nai mulungba kü dang sayuang", Tsüngremi mulungba ngutetba nung anisüngzük angutsü ta metet.

Anogo shibang dang item tebilembatem asen mulungjangi arur. Aika inyaktsü anunga lir. Asenoki asen sasa aitsütsü akok kechiaser asenoki tera dang inyak. Saka külenji temenen inyakba aika lir masü nu? Kar azümesena ali, saka kar anisüngzük mapang magii pei sasa sama, nisunger temoatsü asoshi Amongnü shitetta ayuba mamong pei sasa tesama angu.

Temeim Yisu, onok aiben animesüngzüki aser khuret abener. Onok Ne dangi meyipdakjang kechiaser Ne dak dang onoki onok tanela asoshi anisüngzük angur. Amen.

nung amangba yimya maneni tebilemstü akar. Archbishop of Athens and All Greece, Ierenemos II ajanga sangdong ka nung, "Yashi maksütsü obendang agütsüba, nisung meimchir temeden nung aibelenba aser talisa tamangba yimsü temeden nung Egypt indang judicial authorities-i aibelenba sülen, alima nung Orthodox Christian monument tejentiba, Monastery of Mount Sinai ya tatidang tulu aliba mapang kati ayaoka aier aser puti otsü nung tammang mapang bilemteter," ta ashi.

"Century 15 tashi iba region nung takok manung nokdaka aruba melenshitsütsü merangba ni khukhua aitsür. Ni Greek sorkar aser (Greece) ato kilonser Kyriakos Mitsotakis dang iba temeshi monastery wazüka ayutsü asoshi tangsa tapet mera agitsü ajungshir."

Egypt sorkari tesendaktep tajung nung maneni alitsü asoshi Greece den külemi mapa inyaktsü ta shia lir.

AO OSHI ANGAZÜKDAK:**TANÜ ANGAZÜKTSÜBA OJANG****Tenoka**

(v) temulung agüja, züngzünga (attentively, take heed)

* Tesayuri ashiba otsü tenurtemi kanga tenoka ia anga.

Tenokdangba

(adv) moudaktsü mesüra meinyakdaktsü sot (hindrance, blocking)

* Mapa tajung inyaktsü bilemdang tenokdangba kanga ajurur.



Tir Yimyim

OLONG PAITEP # 7171

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- Nisung jenti
- Tsük rudenba
- Temzüng tesashi
- S_ _ _ i
- Nisung rongnung telemasa
- Anogoshi
- Ajanga aor
- Tsük rizüngdak
- Tebang nungi adokba
- Süngdong tatembangtiba
- Meputep

LANGTSÜNGLEN

- Tenük telong
- Committee dang ajar
- Yagi ki okdoker
- Yim lenmang
- Temoatsü keter meyipa aruba
- Kanga junga menemba
- Kenyongi majinü
- Rong kanga tulu

OLONG PAITEP # 7170 TELANGZÜBA**TIPIEN :**

- Tanga, 6. Wara, 7. Rajang,
- Anük, 10. Jenjang, 11. Alar,
- Ngashi, 15. Nala, 16. Mechi.

LANGTSÜNGLEN :

- Anga, 3. Yabang, 4. Tarok,
- Orak, 8. Ainer, 9. Anema,
- Jabili, 11. Among,
- Miim, 13. Anem.

NAI-A YA METETTER MA

Abortion pill yanglutetsang Etienne-Emile Baulieu arishi küm 98 nung lia June 1, 2025 nü süogo.

French scientist Baulieu-i steroid hormones atema scientific, medical aser social mapa aika inyaka aru ta pa indang institute Institut Baulieu-i metetdaksü. Pa

ya doctor aser researcher ka liasü aser

Baulieu ya Dec. 12, 1926 nü Strasbourg nung aso aser Etienne Blum ta tenüng agütsü saka pa arishi küm 15 asüandang Nazi occupation anema French Resistance nung aden aser idangji "Emile Baulieu" ta tenüng melen.

Agartala Smart City project bushisüngdangtsü akhanger**Agartala, June 3, 2025**

(Agencies): State sorkari Agartala nung Smart City project atema inyakba mapatem bushisüngdang asütsüla ta Tripura Pradesh Congress Committee president Asish Kumar Saha-i metetdaksüogo.

"Smart City project atema sen tim mesüi amshio. Agartala nung flood mitigation atema solution ta ser infrastructure inyak saka tzüngluruwa matongdang tzümetsüng timtem ajurua lir" ta Saha-i ashi.

"Tzüngluruwa matongdang yamai tensa ajurura, tzüngluruwa

mapang kanga tamajungba tia ajurutsü" ta pai ashi.

Agartala Municipal Corporation Mayor-i floods aser water-logging malitsü ta nangzükbatem aitsür ta Saha-isa ashi.

Pai Agartala nung tzümetsüng agi kongshia aliba tesem aika sema senzüba sülen iba osang metetdaksü.

"Terenlok tenüng amer lights kar enokogo aser tilateri mapa kar inyakogo saka tebilemstü tulutiba tzümetsüng mekoktet lir" ta Saha-i ashi.

Sorkari project funds tim

mesüi amshir anungji Smart City maparen atema bushisüngdang tenzüksüla ta pai tai tongloksü.

Congress-i flood control atema tebilemba aika shiogo saka state sorkari magi ta Congress MLA Sudip Roy Barman-ia ashi.

"Yaküm tzümetsüng timtem ajuruba sülen Congress MLA temi flood protection infrastructure tashi aittsü atema proposals agütsü saka ka danga magizük. Tzünglu arura rural aser urban areas nung tzümetsüng timtem ajurur" ta Roy Barman-isa ashi.

Assam tsür ka teküp yokdaktsüba atema BJP lennir apu**Guwahati, June 3, 2025**

(Agencies): Madhya Pradesh kübok Jabalpur nung Bharatiya Janata Party (BJP) kati Assam nungi arishi küm 23 tain tetsür ka tashiyim agi teküp yokdaktsüba atema puogo.

Tetsür la ya Guwahati nungi lir aser lai Gadha police station nung June 1 nü FIR ka benok. Hotel kibur aser pa den yariteper kati la nem teküp yokdaktsü, teka sangshi aser senotsü magütsür ta lai ken o benok.

"Hotel kibur Atul Chourasiya ya local BJP lennir ka lira ser ken o benokba nung ajemdaker puogo. Pa den yaritepsangji

Sheetal (Mathura Dubey) lir saka pa atsüka lir" ta Additional Superintendent of Police, Jabalpur Suryakant Sharma-i ashi.

Tetsür la dang Jabalpur nung clothing company ka nung mapa inyakdaktsütsü ta nangzüker anir aru saka la Chourasiya'er hotel nung inyakdaktsü aser par customers nem teküp yokdaktsü ta tetsürlai benokba ken o nung shia lir.

Police-i Bharatiya Nyaya Sanhita (BNS) aser Immoral Traffic (Prevention) Act, 1956 nung arla tapet balala kübok ken o ka benokogo.

Chourasiya ya okadak kati anir ao aser anogo 14 nü police ket nung ayutsü temelaba agütsüogo.

Tetsür la ya May 2023 nung Jabalpur-i aru aser küm ka ser tesadang inyaka aru ta FIR nungsa shia lir.

"Iba ken o atema bushisüngdang tenzüka arudang tai tongloksü alirtem yagi Assam aser Meghalaya ama northeastern state tem nungi tetsürtem shibelener aser tashiyim agi teküp yokdaktsüba bushitetogo" ta Additional Superintendent of Police Anand Kaldagi-i ashi.

Union Home Secretary & IB Chief nati relief camps semdang**Imphal, June 3, 2025**

(Agencies): Union Home Secretary Govind Mohan aser Intelligence Bureau (IB) Director Tapan Kumar Deka nati Manipur nung tongtipang relief centres ana semdangogo.

Tenati Manipur nung internally displaced persons (IDPs) atema relief maparen inyakba asadangtsü atema aru aser Hombarnü Churachandpur district nung relief centres ana semdang.

Manipur Chief Secretary

Prashant Kumar Singh, Director General of Police Rajeev Singh, aser tanga tongti ketdangsürtemi Govind Mohan aser Tapan Kumar Deka na meina senzü.

Tenati relief operations asadanga senzü aser relief camps nung jenoka alirtem den ajuruteper sensaksem.

Dorcas Locality Community Hall nung Union Home Secretary-i tetsürtem aser tanurtem asoshi maparen aika tenzüksü liasü.

Facility balala tenzüksüba

nung Rural Self Employment Training Institutes (RSETI) kübok Women's Tailoring Centre ka, tanurtem atema creche ka aser "Wall of Hope" dena lir.

Iba tesem nung sentong ka agidang relief camp nung jenoka alirtemi tena nem sobaliba sü tabentsü aser nüngotem agüja liasü.

Tenatia Class I nungi matriculation tashi kaketshirtemi takok tajung anguba atema tenüngsang agütsü. Kaketshirtem nem Certificates of merit aser tanga teyaritem agüja liasü.

**GOVERNMENT OF NAGALAND
MOTOR VEHICLES DEPARTMENT
OFFICE OF THE TRANSPORT COMMISSIONER
NAGALAND-797004
e-mail: commtrans-ngl@nic.in
O R D E R**

Date: 2nd June, 2025

NO.TC-ESTT-DRB/367/2025: In pursuance to the Advertisement NO.TC-ESTT-DRB/367/2025/1422 Dated 13.05.2025, the Departmental Recruitment Board (DRB) conducted an interview on 30.05.2025 at the Office of the Transport Commissioner, Nagaland, for filling up of 4 (four) vacancies post of MTS (Group-D) under Motor Vehicles Department, Nagaland. Based on interview performance, the DRB is pleased to declare the result. Candidates selected in order of merit are listed below:

1 (one) post of MTS (Group-D) under RTO, Mokokchung:

Rank	Candidate Name	Code No	Remarks
1 st	Miss. Sungiemmenla	MKG001	
Waiting List			
	Miss. Imolemla	MKG052	Valid for 6 (six) months

2 (two) post of MTS (Group-D) under DTO, Wokha

Rank	Candidate Name	Code No	Remarks
1 st	Shri. Ebithung S. Murry	TC010	
2 nd	Shri. Ajamo T. Humtsoe	WKA021	
Waiting List			
	Shri. Wobenthung Kikon M	TC011	Valid for 6 (six) months

1 (one) post of MTS (Group-D) under DTO, Phék:

Rank	Candidate Name	Code No	Remarks
1 st	Miss. Neipeu Mero	TC029	
Waiting List			
	Miss. Sezotalu	TC035	Valid for 6 (six) months

Note: Any recommended candidate intending not to accept the post for which he/she is selected may submitted a Non-Acceptance Letter to the Office of the Transport Commissioner, Nagaland on or before 9th June, 2025.

**Sd/-
(ELIAS T. LOTH)**
Transport Commissioner
& Chairman, DRB.

Pakistan nung tepuoker 200 dak tema ajen



Karachi, Aami/June 3 (Agencies): Pakistan kübok Karachi yimti nung tepuokdak ka nungi tepuoker 200 dak tema Hombar aonung menor jenogo. Menoknok anakba ajanga parnok takdang toktsür aotsü asoshi temelaba agütsüba sülen parnoki tanükertem kokteter jena liasü, ta local ketdangsürtem aser police-i ashi.

Menoknok anakba ajanga tepuokertem District Malir tepuokdak kimai alutsü melaba sülen tepuokertem ya ayaterem atongsü lia nungi ajen tenzük aser Mongolbar anepdang tashi jena liasü, ta provincial law minister Zia-ul-Hasan Lanjar-i Mongolbarnü osangbenertem dang ashi.

Police-i ashiba agi, tepuokertemi tepuokdak staff tem ket nungi prangbong rakzüik aser mapang tatsüka khatepba sülen kikümtong tongtiba lapoka liasü. Iba lendong nung tepuoker ka asü aser tanüker asem yirua liasü, ta Provincial Police Chief Ghulam Nabi Memon-i ashi.

"Mapang tatsüka khatepba ni angashi aser iba sülen tepuokertem ajakleni asema ao tenzük," ta tepuokdak opposite nung aliba residential complex ka indang private security guard kati Reuters dang ashi.

Paisa, tepuokertem kar apartment complex yagi ai aser mapang tatsüka lir police-i pur ao.

Mongolbarnü Reuters osangbener kati tepuokdak semdang, shibai tepuokdak glass jaksar aliba aser electronic hadirtem raksar aliba nguogo. Kinungertem den ajurutepba takdang ka kanga mejungi raksar liasü aser parnok kinungertem kima atatepa liasü.

Pakistan nung tang mezüngbuba tepuokdak nungi tepuoker timba jenaogo, ta Lanjar-i ashi, Tepuokdak kong tepuoker 6,000 lir, iba ya Pakistan nung yimti tulutiba Karachi kübok Malir district nung lir.

Police temi arishiba mapang tepuokertem iba tesem nung aonung sangwa asemogo aser

parnok rongnung karbo tetsüing tesa asema local TV footage ajanga sayuogo. Jena aoer shilem 80 bo puogo, ta provincial chief minister Murad Ali Shah-i ashi.

Jail indang superintendent, Arshad Shah-i osangbenertem dang ashiba agi, iba aonung duty nung prison guards 28 liasü aser tepuoker aika rongnungi tera dang jena liasü.

Paisa, tepuokdak security cameras mali, ta ashi.

Ketdangsürtemi ashiba agi, tepuokertem shirnok aika heroin achirtem lir parnok menoknok agi mesüngjemteti kümdakja liasü. "menoknok anakba ajanga parnok mesüngjemteti aküm," ta Lanjar-i ashi.

Provincial chief minister-i ashiba agi, tepuokertem parnok takdang toktsür odahtsüba ya tepuokdak ketdangsürtem tai liasü. Paisa, jena or aliba tepuokertem dang parnoksasa bendanga agütsütsü mepeshia metetdaksüogo ajita mesüra temerenshi tulu agütsütsü ta shiogo.

Gaza nung teyari agütsüba tesem anasa Palestine nunger 27 tepset

Cairo, Aami/June 3 (Agencies): Southern Gaza Strip nung Mongolbarnü chiyongtsü alemba tesem ka anasa Israel nunger sepaitemi Palestine nunger 27 tepset aser aika yiruja liasü, ta local health ketdangsürtemi ashi. Anogo asemnübuba mepetmesü aser azütokshi lendong atalokba ajanga teyari agütsüba inyakyim nung kongshiogo.

Israel military-i ashiba agi, Rafah nung distribution centre anasa pei nem lemzüksüba lenmang nungi pila aoba telok ka dak parnok sepaitemi injang khalokja liasü.

Military-isa, tatalokba dak sendakba nung ken o maneni bushisüngdangdar ta ashi.

Northern Gaza Strip nung Hamas pur den raratepba mapang sepai asem süogo ta Israel-i ashiba sülen ghonda ishika lir iba tesem nung

Palestine nungertem ya tepseta liasü.

Red Cross indang International Committee otongdar kati Reuters dang ashiba agi, Rafal nung parnok indang field hospital-i yirur alir 184 anir aru aser parnok rongnung 19 bo tasü bener aru aser parnok ti mapang tatsüka lir asü.

Temang mejungi alir 35 tangsa tang temang anepalutsü nüngdaker ta otongdar yagisa shisem.

U.S-i teyari agütsüba Gaza Humanitarian Foundation-i taoba hopta chiyongtsü alemtsü atema mezüngbuba tesem amenoka liasü.

Foundation indang teyari agütsütsüba sentong ya tanga teyari agütsüba telok inyakyim dang nungi balaka aser parnok ya United Nations aser tanga teloktemi aija arudar,

parnoki humanitarian principles sülen manidaker.

Iba telok yagi ashiba agi, parnoki Mongolbarnü truck 12 sünga chiyongtsü bener aruba lemstüogo aser teyari agütsüba inyakyim ya teküzmükba kübok kecha tetsükdaktsü madoki benoka inyakdar. Ajisüaka Rafah nung nüburtem tenüngdakba osettem abeni adenshiba mapang maneni tepsetba osang prokshidar.

Deobarnü Palestine aser international ketdangsürtemi nisung 31 tepsetba aser aika yiruba metetdaksüogo. Hombarnüa Palestine nunger asem tepseta liasü.

Israel military-i, teyari atema adenshiba civilian tem amakba osang prokshiba ya tai ta shiogo aser Deobarnü nisung tepsetba ya Hamas puri osang tai prokshiba lir.

OFFICE OF THE
CHUNGTIAYIMSEN VILLAGE COUNCIL
P.O. Mangkolemba, B.P.O. Chungtiayimsen
Dist. : Mokokchung, Nagaland

Takokba Mulungnen O

Takotet rongnung tensemba **Kongro Watitula**, Wb. Lanuakum aser Wt. Chubainla tena jala, lai HSLC tatitang nung tamatiba pungo (top 5) jenjang nguteta konang nüngsang tulu bener arutsü nung Chungtiayimsen Village Council aser Watsü Telen lungjemer la nem aküm agüja tushir.

Tsüngremi jala taküm aser la wadang tarutsü nung alima nübortem asoshi ano maneni moajangni ta sarasadema atar.

Sd/-
Purtemsu Kichu
Chairman
Chungtiayimsen Village Council

Sd/-
Lima Imchen
Secretary
Chungtiayimsen Village Council

Mulungnen O

22.12.1936 - 30.05.2025

Onoki teti meima alila ojala aser otsüla **ASÜR TEYIMTSUNGLA** (Mangmetong) mapang talangka shiranga aliba mapang aser alima nungi pilar onok mangyim tejashi nung alidang temeim, sarasadem aser yimya balala nung yaritepba asoshi ozü mulung taroktiba nungi pelaba lemsateper.

Onok den yaritepba kija aser telok balala dang ozüi pelaba rasaa meshiteter, saka nenoki aria bilema temeim mapa inyakba ajanga onok kanga anisüngzüik nguogo aser tashi agütsüogo.

Nenok kija shia Tulusang Tsüngremi moajang ta ozüi sarasademtsür.

Temeim chirnur, semchir, anük-apang aser kinungertem

Russia-i atsüanem masü takok angutsü meranger: Medvedev



Moscow, Aami/June 03 (Agencies): Russia-i takhangba agütsüba nung alinük tali agütsütsü, neutral linük ka akumtsü, Ukrainian army tasazük lateta yutsüba agizüktsü, parliamentary aser tir election tasen agitsü densema lir.

Senden ya ghonda ka dang amen aser iba mapang linük ana tsüngta tepuokdak alir ser sepai tasü 12,000 melenteptsü mulungtep, saka Ukraine aser par tembar linük temi Russia dang agizüktsü ajungshiba ceasefire indangbo mejembi.

Ukraine-i hopta tatemlen Russian strategic bomber bases amakba atema langzür ama, Moscow-i mang ayangtsü, ta Medvedev-i ashi.

"Asen sepaitem tejakleni nunger aor aser maneni tejakleni takok ngua aotsü. Poksatsütsü nüngdakba ajak poksatsütsü, aser samatsütsü pur samatsütsü," ta pai ashi.

Russia-i takhangba agütsüba nung alinük tali agütsütsü, neutral linük ka akumtsü, Ukrainian army tasazük lateta yutsüba agizüktsü, parliamentary aser tir election tasen agitsü densema lir.

Senden ya ghonda ka dang amen aser iba mapang linük ana tsüngta tepuokdak alir ser sepai tasü 12,000 melenteptsü mulungtep, saka Ukraine aser par tembar linük temi Russia dang agizüktsü ajungshiba ceasefire indangbo mejembi.

Ukraine-i hopta tatemlen Russian strategic bomber bases amakba atema langzür ama, Moscow-i mang ayangtsü, ta Medvedev-i ashi.

"Asen sepaitem tejakleni nunger aor aser maneni tejakleni takok ngua aotsü. Poksatsütsü nüngdakba ajak poksatsütsü, aser samatsütsü pur samatsütsü," ta pai ashi.

Dembele nem UEFA Player of the Year naroküm agütsü



Aami/June 3, 2025

(Agencies): Honibarnü Munich nung Inter Milan goal 5-0 agi koka mezügbuba UEFA Champions League akokba nung teyari tulu agütsüba sülen Paris Saint-Germain striker Ousmane Dembele nem UEFA Champions League player of the season naroküm agütsüogo.

Luis Enrique kübok UEFA Champions League kanga junga asayaba sülen PSG nungi asayar tenet iba asayamung indang 2024/25 Team of the Season nung densema lir.

Dembele shibai asayamung tepeyong nung goal ti idaktsüba den final nung assist ana süja

liasü pa nem UEFA Technical Observer Group-i tenüsang tulu agütsüogo.

Team of the season nung PSG nungi asayar Gianluigi Donnarumma, Achraf Hakimi, Marquinhos, Nuno Mendes, Vitinha, aser Desire Doue nung densema lir. Inter Milan nungi Alessandro Bastoni, Arsenal nungi Declan Rice, aser Barcelona nungi Raphinha aser Lamine Yamal nungera team nung densema lir.

Doue shiba knockout stages nung kanga tongtibang asayar ka aküm, pai Barcelona nungi asayar Lamine Yamal ajateta young player of the year naroküm agizükogo. Yamal-i

iba asayamung nung asaya 13 nung goal pongu idaktsüba den assist asem süja liasü saka pai iba naroküm atema PSG nungi asayar ya majangtet.

Dembele-i Player of the Season anguba ajanga pa taruba Ballon d'Or atema-a jenjang junga akümtsü. Iba naroküm atema September 22 nü vote agütsütsü. PSG coach Luis Enrique-ia iba naroküm angutsü atema Dembele pusemer aser ashiba agi, ni Ballon d'Or Ousmane Dembele nem agütsüla.

Ballon d'Or award atema asadangertem rongnung Yamal aser Raphinha nata densema lir, kechiyong tenapronglai Spain aser Europe naprongla nung kanga junga asayaogo.

UEFA's 2024/25 Team of the Season

Goalkeeper

Gianluigi Donnarumma (Paris Saint-Germain)

Defenders

Achraf Hakimi (Paris Saint-Germain)

Marquinhos (Paris Saint-Germain)

Alessandro Bastoni (Inter)
Nuno Mendes (Paris Saint-Germain)

Midfielders

Vitinha (Paris Saint-Germain)

Declan Rice (Arsenal)

Forwards

Lamine Yamal (Barcelona)
Désiré Doué (Paris Saint-Germain)

Ousmane Dembélé (Paris Saint-Germain)

Raphinha (Barcelona).

Indonesia Open: Satwik-Chirag, Sindhu Pre-Qaurters-i iogo



Satwiksairaj Rankireddy aser Chirag Shetty

Aami/June 3, 2025

(Agencies): Mongolbarnü Indonesia Open Super 1000 badminton tournament nung PV Sindhu aser tebur tarep asayar Satwiksairaj Rankireddy aser Chirag Shetty nungeri pei tata asaya koka pre-quarterfinals-i iogo, ajisüaka Lakshya Sen bo mezügbuba round nung tsükogo.

tetsür kija asaya nung Sindhu-i Japan tsür Nozomi Okuhara 22-20, 21-23, 21-15 agi koka liasü. Tena tsüingda ghonda ka ser minute 19 asaya.

"Ni mezügbuba round nung aiben tsüka aruogo, anungji ni iba amala asaya akoktsü kanga tongtibang," ta Sindhu-i asaya tembangba sülen ashi. La

taruba asaya Thailand tsür sixth seed Pornpawee Chochuwong den asayatsü.

Tebur kija asaya nung 2021 World Championships bronze medallist Lakshya Sen-i kanga meranga asaya saka 11-21, 22-20, 15-21 agi China nung world number two Shi Yu Qi makok. Shi ya iba asayamung tenzükba mapang nungbo world number one asayar liasü saka pa asaya tembangba sülen sangdongba rankings nung pa tanabuba jenjangi lua liasü.

Sen, shiba taoba hopta Malaysia nung asayaba mapang teberm yirua liasü, pai kanga meranga asaya-a tanabuba game nung 11-17 aliba nungi meyipa tur asaya akok ajisüaka tasembuba game Shi-

i amokbanger asaya-a pai asaya akok.

Tebur kija asaya nung HS Prannoy-a iba USD 1,450,000 asayamungi nungi tuguogo. World Championships bronze medallist yagi 17-21, 18-21 agi Indonesia nung asayar Alwi Farhan mekoki liasü.

Iba sülen tebur tarep asaya nung Satwik aser Chirag nati mezügbuba round nung Indonesia nung tarep Leo Rolly Carnando aser Bagas Maulana na 18-21, 21-18, 21-14 agi koka round of 16 tongtetogo. Tarep ana tsüingda minute 67 asaya liasü.

Iba asayamung nung India tsürtem rongnungi Sindhu kija taruba round tongtetogo. Malvika Bansod mezügbuba round nung Indonesia tsür Putri Kusuma Wardani den asayaba mapang asaya tom nung yirur masayatetsüsa aküm.

Malvika-i iba asaya ya 21-16, 16-15 agi koka aliba mapang la court nung ajutoker alang aser temekok raksa-a asaya nungi anentsüsa aküm.

Nick Kyrgios Wimbledon nung masayatsü

Aami/June 3, 2025

(Agencies): 2022 Wimbledon finalist Nick Kyrgios-i Mongolbarnü sangdong ka ajanga pa taküm iba asayamung aser grass-court season nung masayatetsü ta shiogo. Pa yirur aliba taneptsü mongutetba ajanga masayatetsüsa kümogo.

Arishi küm 30 tain Australia nung asayar ya küm ana shi yiruba ajanga junga masayateti arudar aser tang tekanük yiruogo, koba surgery agitsüsa kümogo.

March ita pai Miami Open nung 2022 küm sülen mezügbuba kija asaya ka koka liasü. Ajisüaka pa French Open nunga masayatetsüsa aküm. Iba asayamung nung pa tarep asaya nung asayatsü liasü saka temekok yiruba ajanga masayatetsüsa aküm.

"Ni tang taneptsü bushiba mapang tetsükdaktsü tilaka adokogo, anungji ni taküm grass season nung masayatetsü," ta pai Instagram nung post sütsü.

"Ni asayaba reprangtsü atema nenok yonga aliba ni meteta lir aser nenok



tezü dangdaktsüba atema kü dang taitokang," ta paisa ashi.

Kyrgios shiba sempet aketba asayar tajungka saka asayaba tesem nung aiben mit adokba ajanga timtema arudar paisa, "iba ya lenmang nung tetsükdaktsü tilaka lir aser ni taoba mapang dang nungi tashi taitba meyipa arutsü atema meranga inyakdar," ta ashi.

Kyrgios taoba küm Wimbledon final tonga asaya saka pa final nung set pezü asayaba sülen Novak Djokovic-i tsükdakja liasü.

Taküm küm atema tasembuba Grand Slam; Wimbledon ya July 3 nü nungi tenzuka asayatsü renema lir.

Sarri tanaben Lazio indang caoch kümogo



Aami/June 3, 2025

(Agencies): Lazio coach mapa toktsür ita 15 sülen Maurizio Sarri tanaben Lazio nung denogo.

Arishi küm 66 tain coach yagi Marco Baroni melenogo, shiba lenisüba nung iba Serie A club ya taoba season jenjang tenetbuba nung tembang aser Europe nung asayatsü atema maongka monguteti liasü.

Sarri ya 2024 küm asaya trok nung pongububa makokba sülen mapa nungi anen aser pai club indang transfer policy kanga mejungi aija liasü.

Taoba mapang Chelsea caoch ya Lazio nung küm asem inyakogo aser tir Claudio Lotito-i ashiba agi, Maurizio Sarri kidangi meyipa aruogo.

Naples nung asasang Sarri ya tekübokba jenjang nung asayaba Italy club tem nung inyaka tenzük aser iba mapang pa banker ka liasü.

2000s tetenzüklen pai pa mapa toktsü aser coach mapa

inyaktsü atema rangloker inyak, saka pa arishi küm 55buba nungang Italian top-flight tongteta liasü. Pa lenisüba nung 2013-14 season nung Empoli pur Serie A asayatsü maongka ngua liasü.

Iba sülen Sarri lenisüba nung Napoli pur küm asem tsüingda anaben tashi tanabuba jenjang nung tembang aser pa nem 2016-17 season nung Serie A manager of the year naroküm agüja liasü.

Pa 2018-19 season nung Chelsea nung inyak aser iba mapang parnoki Europa League akokba den Carabao Cup final tonga asaya. Iba sülen pa Italy-i meyipa ao aser Juventus nung inyakba mapang title bena liasü.

Sarri 2021 küm Lazio nung aden aser pa lenisüba nung 2022-23 season nung parnok tanabuba jenjang nung tembang, koba 1999-2000 küm sülen league nung jenjang tajungtiba nung tembangba liasü.

BILEMDANGANG

"Na kanga tongtipang."